



Broj: 03/1-50-14-7-11/15

Sarajevo, 3.11.2015.

**PREDMET: Informacija o posjeti članova Zajedničke komisije za odbranu i sigurnost
BiH Službi za poslove sa strancima Ministarstva sigurnosti BiH,
1.10.2015.**

Članovi Zajedničke komisije za odbranu i sigurnost BiH (u daljnjem tekstu: ZK) posjetili su, 1.10.2015., Službu za poslove sa strancima Ministarstva sigurnosti BiH.

U delegaciji ZK bili su: Sifet Podžić, predsjedavajući, Hazim Rančić, Bariša Čolak, Hanka Vajzović, Mario Karamatić, članovi ZK, Ljiljana Milićević, sekretarka, i Željko Grubešić, stručni savjetnik.

Sastanku s članovima ZK u Glavnom sjedištu Službe za poslove sa strancima prisustvovali su: Izet Nizam, zamjenik direktora, te njegovi najbliži saradnici iz menadžmenta Mišo Ćavar, Rade Kovač, Ivo Ramljak i Danial Ganić.

Ova radna posjeta obavljena je u skladu s Godišnjim planom rada za 2015. godinu te u sklopu pripreme 5. sigurnosne konferencije koja će, u organizaciji Zajedničke komisije za odbranu i sigurnost BiH, biti održana 4. i 5. 11. 2015.

Zamjenik direktora Službe za poslove sa strancima Izet Nizam sa saradnicima informirao je članove Zajedničke komisije o aktuelnom stanju u Službi.

Istakao je problem s popunom ljudstva jer je od sistematiziranih 310 radnih mjesta trenutno popunjeno 227. U BiH se nalazi 8680 lica koji imaju status privremenog boravka. Imigracioni centar kapacitiran je za smještaj 120 osoba.

Posebno se razgovaralo o aktuelnoj migrantskoj krizi, kapacitetima Službe i spremnosti njenih struktura da odgovore izazovima koje je migrantska kriza uzrokovala u regionu i šire. Izet Nizam i njegovi saradnici prezentirali su moguće pravce ulaska izbjeglica u BiH kao i potencijalne kapacitete za njihov smještaj. Istakli su i značaj dobre saradnje sa susjednim zemljama i njihovim nadležnim i komplementarnim službama.

U razgovoru sa čelnim ljudima Službe za poslove sa strancima članovi Zajedničke komisije bili su u prilici da se uvjere u ozbiljan pristup Službe i drugih nadležnih institucija BiH problemima koje proizvodi migrantska kriza. S tim u vezi, razgovarano je o sigurnosnim i humanitarnom aspektu krize, s kojom bi se naša država eventualno mogla suočiti.

Ostaje i dalje problem pojedinačnih zloupotreba viznog režima na što je Služba vrlo brzo reagirala. Razgovaralo se i o ulozi Koordinacijskog tijela Vijeća ministara BiH za upravljanje aktuelnom migrantskom krizom kao i koordinaciji u radu policijskih i sigurnosnih agencija, kako onih iz sastava Ministarstva sigurnosti BiH, tako i saradnje s nadležnim entitetskim i kantonalnim MUP-ovima.

Od čelnih ljudi Službe za poslove sa strancima članovi Zajedničke komisije dobili su uvjerenja da se vrlo ozbiljno prati svaki detalj u vezi s migrantskom krizom, te da svi subjekti u sektoru sigurnosti međusobno sarađuju s ciljem pronalaženja adekvatnih rješenja.

Predsjedavajući Zajedničke komisije

Sifet Podžić

Dostavljeno:

- naslovu
- a/a